

SARRERA U
BERTAKOAK E

PROHIBID
PERSONA

ARRRETARA
PERTSONENTZAT
O EL PASO A TODA
AJENA A TALLERES

astola

ikerketa eta historia

DURANGALDEKO URTEKARIA

15.zk 2021 • 5€



Barruko ibilbideak

📷 Txelu Angoitia

Bost gonbidatuek barruko bidezidorretatik eramango gaituzte, sakoneko bidexka apaletatik.

Paisaia ikusgarriak alde batera utzita, leku xumeetara eta intimoetara begiratzeko gonbitea egiten digute, eurentzat oso bereziak diren bazterretara gerturatzeko keinua.

Sarritan bakoitzaren haurtzarora egiten dute bidaia. Rilke poeta handiak esan zuenez, horixe omen da "gure aberri bakarra".

Munduko lekurik kutunena denez, euren burua horra loturik dago. Leku hori gure jatorria izango da urliarentzat; helmuga sandiarentzat; eta ametsen lurralde hauskorra berendiarentzat.

Ale honetara ekarri ditugun gonbidatuentzat toki horiek Durangaldean daude.







MARIAN DÍAZ GORRITI

Larrasoloeta. Durango
Hautzaroko bazter
arduragabea.

Behin zume negarti eta marmarti baten bizitokia izan zen familiako lorategi hau, 1965ean, elkartze hunkigarri baten lekuko izan zen. Abuztuko egun baten, nire aita eta bere anaia txikia euren “galdutako” arrebarekin elkartu ziren. Arreba gerraostean “galduta” egon zen, ia 20 urtez ez zuten bere berririk izan, eta berak nebak zituenik ez zuen gogoratzen. Egun hartan ezagutu nituen nire “Frantziako” izeko-osabak.

Momentua gorde zuen argazkiari esker, lorategi hau nire leku kutuna da. Gaur egun ere, sarri, nire ibilbidea aldatu eta txaletaren aurretik pasatzen naiz, gaur egun Gerediaga Elkartearen egoitza den eraikin horren aurretik, eta beti ere honako esaera gogoratzen dut: *A veces, en cada acto adulto, la infancia nos vigila.*



N-634

PROVINCIA
DE
GUIPUZCOA



GAIZKA ZABARTE

Olaerrega

Zaldibarko ertz batean.
Durangaldeko ekialdeko muturrean.
Ibur erreka Egon isurtzen den deslekua.
Mikeleteak eta aduana; bidesaria ordaindutakoan jaisten zen katea.
Olak, argi-zentralak, errotak, baserriak, aroztegia, tailerrak, benta, okindegia.
Errege bidea, gerora errepidea; trenbidea, autobidea, saihezbidea.
Basoan ezkutatutako industria-gune basatia.
Dena bertan.

MILA SALTERAIN

Abadiño

Barkilarioak? Non sartu dira barkilarioak?
Euren luma urdin bizi eta hegaldi azkarrarekin
ihes egin ote dute? Nork izututa?

Hara, eta infernuko burruntzia? Nora bidali
dituzte infernuko burruntzia? Kanpotik
etorritako mika trakets zaratatsuek bultzatu ote
dituzte eurenak ez diren parajeetara?

Eta zubiari falta zaion harlauza? Noraezean
ote dabil Ibaizabal barrena? Ez ba, harlauza
hemen ageri da, errekan. Mende batzuetan ur
handiekin borrokan ekin ondoren, uriola zitelen
batek ostuko zion zubiari, bortxaz, eta hemen
datza uretan, enparau harlauzekin elkartu eta
zubia nork konponduko zain.





ANGEL ZELAIETA

Mallabia

Nire jaiotxearen izena etxea eraiki zuten langileek asmatu zuten. Aitak pentsatu zuen ezkontzerakoan tabernatxoa ipintzea bidegurutze batean, eta etxe berria egiten hasi ziren. Garai hartan, teilatua ipintzean, montxorra emateko ohitura zegoen, baina amamak ez zien afaririk ematen lanean zebiltzan harginei, eta haiek "Hambre" izena jarri zioten etxeari.





AINHOA URIEN

Sagasta – Irazola

Bi auzoen arteko muga. Mundu bakar bat, basoak bananduta. Zuhaitzez, iratzez, sastrakaz eta animaliaz betetako gunea da pasabide. Mendi-lerroaren altzotik gure tontorrek bistan.

Nire babeslekua aurkitu dut, landare berezi eta ezkutatutako espezieen soinuarekin. Iluntzean, mendiek eguzkia iruntzi aurretxoan, hosto berdeetatik sartzen dira izpiak, hirietako etxeetan pertsiana artetik bezala. Non ezkutatu, nora begiratu eta, batez ere, norbere etxeak bezala, nora itzulia ematen dit basoak.

Basoak babesten gaitu hala behar dugunetan. Hazten gaitu, hartzen gaitu, biltzen gaitu. Ederra eta gordina; lasaitasunean murgiltzea eta, aldi berean, bizirauteko zoli egon beharra; gaueko ulu beldurgarriak eta goizeroko txorien iratzartze alaiak. Basoan biziraun behar duen espezie bat gehiago baino ez garela diosku basoak berak.

